

嘉慶新修江寧府志

新修江寧府志卷之四十一

人物八 隱逸

晉郭文字文舉河內軹人也隱餘杭大辟山中王導聞其名遣人迎之置之西園居七年忽逃歸臨安見南史
隱逸傳

宋周續之字道祖雁門廣武人也遁跡廬山與劉遺民陶淵明稱潯陽三隱宋武帝踐祚召之爲開館東郭外招集生徒乘輿降幸聽其講續之素患風痺後不復堪講乃移病鍾山景平元年卒

雷次宗字仲倫豫章南昌人也少入廬山隱退宋元嘉

十五年徵至開館於雞籠山聚徒教授久之還廬山後
又徵詣郡爲築室於鍾山西巖下謂之招隱館卒於鍾
山

齊吳苞字懷德濮陽鄆城人也宋太始中過江聚徒教
學齊隆昌元年徵爲太學博士不就始安王遙光及江
祐徐孝嗣共爲立館於鍾山下當時稱儒者自劉瓛以
後惟苞一人而已

梁阮孝緒字士宗陳畱尉氏人也年十五冠而見其父
自是屏居一室非定省未嘗出戶家人莫識其面天監
十二年詔徵不至嘗於鍾山聽講母王氏忽有疾心驚

而反人嗟異之合藥須得人葠舊傳鍾山所出孝緒躬
歷幽險累日不獲忽見一鹿前行感而隨行果獲焉卒
年五十八門徒追論德行諡曰文貞處士

陶宏景字通明丹陽秣陵人也年十歲得葛洪神仙傳
晝夜研尋便有養生之志父爲妾所害宏景終身不娶
爲學以一事不知爲恥齊高帝作相引爲諸王侍讀雖
在朱門閉影不交外物永明十年脫朝服掛神虎門上
表辭祿止於句容之句曲山嘗曰此山下是第八洞宮
名金陵華陽之天乃立館山中自號華陽陶隱居人間
書札卽以隱居代名卒年八十五贈大中大夫諡曰貞

白先生

陳馬樞字要理扶風郿人也隱於茅山陳天嘉中徵不至及鄱陽王爲南徐州刺史卑辭厚意令使邀之不得已乃行王別築室以處之樞惡其崇麗乃於竹林間自營茅茨而居

以上俱見南史隱逸傳

唐秦系字公緒越州會稽人天寶末避亂客泉州結廬九日山中未嘗至城門其後東度秣陵隱居茅山自號東海釣客劉長卿有贈系詩唐書隱逸有傳

顧况字逋翁海鹽人爲韓滉判官歷江南郡丞校書著作郎後居茅山自號華陽真逸焦山瘞鶴銘或疑陶宏

景書或疑况所書也

韋牟號遺名子上元人大歷中隱居鍾山西巖飄然有物外之趣顏真卿題其所居曰三教會宗堂

陳融六合人好學不仕卒諡貞晦先生呂溫爲作記表

其行

二人唐書無傳
依舊志載之

宋吳思道金陵人以詩爲蘇軾劉安世諸人所賞官至團練使宣和末棄官不仕後寓新安野服翛然如雲水人

辛思順金陵老儒也皇祐中沽酒江州人無賢愚皆喜之時劫江賊方熾有一官人艤舟壚下偶與思順往來

相善因以酒十壺餉之已而被劫于蘄黃間羣盜飲其酒驚曰此辛秀才酒耶官人解其意給曰僕與辛秀才親舊賊相顧駭曰吾儕何爲劫辛老所親哉歛所劫還之且戒曰見辛勿言思順年七十二日行二百里盛夏暴日中不渴蓋嘗啖物而不飲水云

侯遺一名仲遺隱居茅山勅書院敎授積十餘年天聖間王隨知江寧府奏請於茅山齋糧田內給三頃充書院用從之

侯蕃字仲瑄句容通德鄉人講貫六經大義志在林泉踪跡不入城市人以龐德公比之

朱南強字德方隱居句曲之古隍溪溪水東流因自號東溪別號駝醪著有駝醪稿卒年七十三歲王去疾銘其墓趙孟頫書之祀鄉賢

梁棟字隆吉相州人宋亡與弟柱入茅山後卜居建康江東人士從學甚衆一日無疾坐逝壽六十四

元孫轍字履常金陵人後家臨川學行純篤事母以孝聞家居教授門庭蕭寂士至郡以不詣轍爲恥部使者長吏之賢多造焉憲司屢辟不就元史有傳

丁復字仲容以詩名落拓不偶灌園自樂四方之士多載酒求詩復引觴揮毫未嘗起草而語率高絕壻饒介

裒得百餘篇名檜亭詩稿李桓爲序

居仁字仁恕句容人洪武初徵入朝與之奕賜以內醪辭不就職隱于家闢軒面竹人稱瞻菴先生見元史儒學同恕傳

王德甫字體仁句容人以儒行任真州判官擢本州知州元季飄然歸隱明初屢徵不起力田營室種菊自娛自號菊叟

王德昇句容鄉人至正間屢徵不起

袁當時字良所丹陽人良所避紅巾亂卜居漂水遇茅山異人授以方書遂遁跡方正學端木孝文咸重之

王元吉金陵人年十四歲饑與兄行糴旁縣遇盜將劫之兄懼走匿元吉不爲動徐罵曰庸縣官使吾運粟許夫防我而不至若豈防夫耶後有粟車數十兩若其防後至者盜以爲然散去福壽在金陵陳也先潘甲聚兵數千自稱元帥聲言討賊索餉城下福壽憂不知所出元吉請見言曰盜兵悍甚此難與爭鋒公宜開城門陳芻粟若將饋之者而以好言紿之請一元帥將卒來取彼聞吾言莫測深淺主者必自來吾以計殺之而制其一人易矣福壽從其言潘甲果自來執殺之也先遁去明興元吉噤不言世事隱肆中自給以布衣終

王顯江寧人號溪漁子有雄才往來江淮間所交多大俠異人一旦盡悔所爲買書數千卷讀之爲文章奇偉伉健然恥以自名嘗曰漢無儒者惟賈生諸葛孔明耳唐陸贄粗有識然不足以幾王道所貴乎學將以輔天地所不及耳不然多讀書何爲顯父名元賓少從名儒學藝能蓋衆體貌魁然知世變遂決意避世方正學嘗謂顯遠利詭隱爲一世奇士方之元賓可謂難爲父子矣

賀確字存誠先世隴西人徙金陵確於學靡不通貫爲文辭下筆輒有古風以菊有隱操篤愛之自號友菊居

士學士周敘以其有史才薦修宋遼金三史不就

龍暄字克溫上元人與邱濬陳獻章爲友自號半閒居士士之過金陵者以不識克溫爲猶徒行也顧璘作半閒居士傳

倪誠字允恭文僖公謙之兄也幼讀書知大義工詩善飲自號坦菴闢別墅於韓橋江潯足跡不入城市吳匏菴李西涯咸重之

王可立可久幼弟也可久別有傳可立少有高韻爲諸生謝去家有小園蒔花木自娛翛然塵外視名利漠然七十後猶手書所纂小程史數十卷御子弟嚴家法爲

時所重人稱丹邱先生

史相字元昭號緝熙道人少孤貧獨養孀母會詔舉經明行修之士有司以元昭應妻顧氏謂之曰人盡臣也子實無二顧養而廢仕誰曰無君子曷辭焉遂不就工畫山水以老壽終

金振號竹溪上元人工詩不仕

金琮字元玉號赤松山農與史忠稱金陵二隱書法精工文徵明極賞之弟璿字元善隱於醫

史忠字廷直號癡翁作臥癡樓於冶城之側嘗訪沈石田於吳門值他出見几有素絹因潑墨成山水巨幅不

通姓名而去石田歸見之曰必金陵史癡也要之歸畱三月而別忠有女及笄壻貧不能具禮乃詭攜觀燈同妻送之壻家其曠達多如此

朱慶期字仲望上元人工詩善畫無所干求子睿慤亦有高韻中年構草堂於石頭城側曰招隱至今人猶傳之

孫石字介臣上元人宿學有盛名時人擬之百尺孤松晚年減緣息慮求性學之宗旨足跡不踰戶外同里有廖傅生張彥先亦皆清修之士

張正蒙字子明世居通濟門外之晉灣潔修自愛詩文

豪逸年九十猶能日行數十里不倦

魏之璜字考叔少孤貧以書畫知名性孝友養親撫弟
皆取給於書畫未嘗干人公卿過訪不一報謝慕其風
者或設醴折節以冀其一至焉

胡宗仁字彭舉本富家子晚隱冶城山有知戴齋集竟
陵鍾惺叙之

張風字大風上元人家貧妻亾不再娶嘗衣短衣北走
盧龍上谷登昌平天壽諸山夙善畫至是葢工後歸鄉
里多寓僧寮道院泊然世外畫登逸品尾署真香佛空
或稱昇州道士

方登字嘯門上元人慕孫登之爲人故以爲名及字又自號樵城子工詩年七十餘卒

顧源字清甫江寧人豪雋不羣中年究心禪理臨終舉室聞蓮花香端坐而逝殷侍郎邁作寶幢居士傳焦修撰竝刻其玉露堂稿行世

張之斗號希坦江寧人世職千戶累官浙江總兵甲申流寇陷京師之斗歸隱山中不復粒食日采野菜啖之如是者六十年

房宏中字子潤上元人能詩工古文辭貌頽皙而臞嗜酒喜遊崇正丁丑賦詩六章棄妻子去後有清涼寺僧

於匡山見之云將往峨眉遂不知所終

孫自修字無修江寧人天啓甲子舉人授陽江令遷大同同知感時亂盡遣愛妾棄家祝髮結茅於人跡罕至之處顏曰懸溪菴擔柴負重以自給其子間關往省勅斷家事以學道讀書相勉而已交游有識其面者輒避去不顧

黃周星字九煙江寧人崇正庚辰進士授戶部主事卽疏論時宰奪情事詞氣忼直甲申之變棄家走閩中爲道士更號笑滄奔走四方殆四十年癸亥五月五日忽書絕命詞負平生著述躍水中死年七十二

鄧良材字干霄江寧人潛心陸王之學甲申之變號痛哭日遂絕意仕進葛巾野服翛然以終同時周掌文字澤宮家貧有志操不屑干人工楷法小篆晚歲隱居冶城

胡長庚字星卿東川侯海之後也海子觀尚南康長公主以靖難不屈失侯降襲指揮使長庚幼有大志崇正朝以蔭讓其弟已讀書爲諸生晚盡棄家財結廬南康墓旁足跡不入城市號茅屋老人門人私謚曰貞讓楊廷俊字額之上元人甲申後隱居不仕

金呂字伊仲號綸叟上元人讀書樂志甲申後遂隱居

不仕慕陶靖節之爲人以詩酒自娛嘗自題小像以見志

黃宗洙字鹿崖人稱黃山人居貢院東首河房卽丁繼之故宅山人貧而樸質口誦國初諸名人詩至數十家年過七十隻字不怠談逸事娓娓可聽

陶信菴舊志遺其名句容上容鄉人耽詩景泰間屢辟不就

李源字克中句容人明周易理數之學精書畫明初以碩德徵不就自號無益居士

笄宗鏡字長人句容人事母以孝聞甲申後屏跡杜門

自號實闕農

夏鑑字文明溧水人少有氣節性孤介無所合人亦罕有至其門者久之里人習其名爭延致之卒不往所著有漁樂集弟子稱漁樂先生

徐一鵬字翔徵高淳人盧公象昇嘗出其門崇正中象昇特疏薦於朝稱其學識老鍊文行直逼古人甲申後隱居不仕

黃揆字敘百高淳人崇正間諸生少穎敏絕倫長工詩古文辭尤善邊略溧陽守備馬信延之幕中甲申後與信匿海中十數年士卒苦海水鹹揆以法作爐升煉其

清者飲之海中稱黃公泉已乃踰閩浙來歸詣軍門自陳時年甫四十家居不仕卒年七十餘

趙夔字孟敦高淳人崇正庚辰進士甲申後隱居不仕徜徉山水每有所感則涕泣投袂而歸工書畫然不多作有得其尺幅者珍若璧寶焉

孫越字疑之高淳人甲申之變聞報設位以哭乃掛青衿於澤宮之門隱居教授足不入市者四十年所居風雨不蔽家徒四壁宴如也縣令某投刺就見越牆遁去卒年八十

湯之典字幼常高淳人甲申後謝世事築室退處方龕

山邢石曰咸重之

陸光卿居淳溪之西隴好吟咏著有閒適草號松閒子
莊志甫本章姓江浦人松江籍定山先生昶之祖也志
甫能詩文精數學明太祖卽位有司交薦不起挈妻子
游淮泗閒後至江浦遂家焉成祖北狩上書言時政十
事多見採納其孫昶有詩紀其事

許炎江浦人有學識嘗赴闕陳時政如除種馬還蘆洲
凡甦民困之事皆極言之

鄭朝聘江浦人游焦澹園之門所著有廬言家範皆躬
行實踐不同空言受業諸生立祠石磧橋祀之號爲良

嶽先生

國朝紀青字竺遠上元人能詩少爲諸生業棄去入天臺國清寺爲僧久之復捨去其子映鍾字伯紫載文苑傳女映淮字阿男載列女傳新城王阮亭記青遺詩數篇諧麗高逸得唐賢勝概有樺冠集

余遜字公沛上元人明南祭酒孟麟後也性誠朴不外慕寓烏龍潭濟生菴坐臥一樓六十年不入市讀書自娛尤精樂律平居鼓一琴長尺許不肖爲人彈有竊聽者以爲音節迥異年八十餘其姪離斯年近七十奉侍几杖克盡子職人咸稱之

謝璣字在之上元人明季歲饑區畫賑卹諸事都憲張瑋以璣有濟世才薦於朝辭不就隱居龍溪

王應憲字德卿上元人少負奇氣文行著於鄉隱居著述有河漕水利鹽鐵諸考

程邃字穆倩江寧人能詩善書工畫人得其片紙者莫不珍以爲寶孝感熊相國欽其高義贈野全道者四字額

吳越彥字季舒高淳人古懷子古懷載篤行傳越彥性孝母卒廬墓三載康熙中舉隱逸學行之士有司以其名應固辭不就丁丑徐用錫邀之入都鮮所接見惟賣

卜蕭寺作浮梗孕玉諸賦一時名流咸欽仰焉所著有巢軒集耕餘錄立修堂稿牆東草堂稿行世

楊曰祐字秩人高淳人爲文薄西京以下年二十餘卽棄舉子業結廬溪上自號蘆中人著蘆中詩集十卷林登儁江浦人崇正間以守城功授通判不仕

國朝順治間縣令屢以山林隱逸薦固辭

新修江寧府志卷之四十二

人物九 流寓

郡縣志紀流寓所以別土著重名賢也其先世人入籍
及其人無足短長者固不能盡載之矣舊志所載考之
史傳有於此全無涉者悉爲芟去又江寧自東晉渡江
士大夫之在南者無非流寓也今故斷自唐始唐李白
字太白咸秦人天寶時爲供奉求還山舟至金陵游冶
城謝公墩因營園於其上其後爲永王璘所逼璘敗坐
流夜卽遇赦還復至金陵晚居姑孰悅謝家青山遂終
焉唐書有傳

南唐李建勳字致堯廣陵人德誠第四子少好學能屬文尤工詩尙廣德公主家世將相爲國貴游然杜門不豫世事所與交皆寒酸裘馬取具而已元宗立拜司空稱疾乞骸骨以司徒致仕賜號鍾山公營別墅山中放意泉石疾萃遺令薄葬卒贈太保謚曰靖南唐亾公卿冢鮮不發者惟建勳不知葬所得全

韓熙載字叔言北海人唐同光中擢進士第父光嗣爲平盧節度使軍中逐其帥推光嗣爲畱後坐死熙載南奔元宗知其才而未顯用熙載感之數言朝廷事展盡無所回隱後主屢欲相之熙載以聲色自汙竟不果用

卒後贈平章事年六十九葬城南梅岡

宋王安石字介甫臨川人父蓋通判江南因家焉安石相神宗封舒王以使相判江寧府事熙寧九年罷判府事爲集禧觀使其居近謝公墩自號半山居士元豐七年請以居宅捨爲寺遂居白下門卒諡曰文弟安禮安國子雱宋史皆有傳

鄭俠字介夫福清人初隨父輦赴江寧府監稅讀書清涼寺時王安石以中書舍人持服居金陵俠攜所業往謁遂受知及安石入叅大政俠爲光州司法數言新法之害不聽後在京監上東門屢上書言事被謫及還鄉

所餘一拂因自號一拂居士後人爲祠於清涼寺以祀之宋史有傳

文復之字廷實合州人第三名及第累官至湖北提刑以起居舍人召爲丁大全所止不得見乞祠祿授朝散大夫主成都府玉局觀道經建康馬光祖畱不聽行遂居江寧之修文坊元廉希愿宣撫江東欽其名待如師友欲以故官薦力辭不應

張栻字敬夫忠獻公浚之子忠獻開府建康栻內贊密謀外叅庶政愛城南天禧寺清邃埽石讀書名曰南軒後人因建祠以祀之宋史有傳

紀景河南舞陽人歷官兩淮經制使靖康護蹕南渡以疾致仕寓居句容之移風鄉卒葬高驪山建菴於墓宅曰紀家菴馬光祖撰碑

明史謹字公謹崑山人洪武中謫居雲南與王學士景善用景薦爲應天府推官未幾左選湘陰縣丞尋罷僑居金陵性高潔耽吟咏工繪事構獨醉亭賣藥自給以詩畫終其身

杜環字叔循廬陵人父一元宦金陵因家焉環好學能文尚行義後爲晉府錄事太常寺丞

周瑄字廷玉陽曲人歷官南京刑部尚書瑄居官廉故

鄉無田宅可歸遂家江寧卒諡莊懿贈太子少保子經亦仕至尙書

陳壽遼東人十歲能屬文家貧無擔石儲意恒廓然嘗游市得遺金候其人還之爲諸生不第乃遍游塞上欲持戈建功名久之無所遇歸習舊業舉成化丙戌進士累官大理寺丞宏治中火篩寇邊壽以薦命巡撫延綏聞命馳至軍指授諸將所在有功賜手勅勞之正德中爲南京刑部尙書解官不能歸旅寓蕭然遂家焉

唐時字宜之烏程人資稟高潔飄舉世味之外自楚藩長史棄官歸臨烏龍潭築室吟咏自適人傳其佳句以

爲不減白太傅云後捨宅爲庵額名妙意

按今爲江寧嚴戚家庵

張文峙字紫淀初名可仕字文峙楚人家金陵莊節公可大之弟也莊節別有傳文峙貫穿經史辨覈掌故務爲根柢有用之學范大司馬景文叅贊畱務詢防江戰守之備文峙臚陳古今撰南樞志一百七十卷范殉國文峙設位雨花臺爲文哭之與歸安茅元儀善茅死有姬楊宛以才色稱戚畹田宏遇欲得之以千金壽文峙求喻意文峙絕弗與通崇正末集子史成句爲四言詩一卷諷切時事號擊磬集纂明布衣詩一百卷弟可度字季筏好佛

周鑑字仲馭金壇人僑寓高淳坐東林黨禍被逮赴獄
時邑之人士從行者甚衆

沈壽民字眉生宣城人僑寓銀林最久與周鑑同坐東
林黨禍死

羅高偲字無美豫章人僑寓高淳與魏翰先韓无疾魏
生直魏吉溧水趙之驛等結文社稱湖濱六子

國朝杜濬字于皇黃岡人晚號茶村老人明諸生僑居江
寧以詩名明季詩自竟陵鍾譚矯王李規模漢魏之習
流而入於淺薄獨濬不染楚風嘗咏東坡詩二十字爲
合肥龔端毅所賞有變雅堂集若干卷

黃國琦字石公新昌人明崇正丁丑進士仕至兵科給事奉母南歸家金陵雖旅寓於此於地方利弊知無不言當道咸貴重之

章宸字格庵紹興人福王時官吏部尙書後逸去上元諸生袁瑛嘗見一僧帽道衣儒舄而游於市者延至家聆其議論知非常人建小閣居之十年臨終始言我故明吏部章宸也王士禎記章格庵後身事甚奇見池北偶談

熊賜履字敬修孝感人順治戊戌進士文淵閣大學士致仕後卜居江寧城北蓮花橋著道統學統等集事載

名臣列傳

梅穀臣字循齋宣城人徵君定九之孫也康熙時以生員通中西法

召見供奉

內廷

賜翰林

國朝歷法及明史天文志所手定也乾隆時官至左都御史致仕奏請移籍江寧以原官俸食於家卒

賜祭諡文穆祀鄉賢在朝以彈劾權貴有直聲事載名臣列傳
季子鏐字旣美爲宣城學生員隨穀臣居江寧鏐性孝

友不慕榮利不爲俗學父在時清晨臥未起卽屏息立榻前及夜分俟父寢命之退然後退雖洩溺之器必親之恒終日不入妻室兄鈐字二如亦字式堂乾隆戊午科副榜舉人有文行早卒病革時鏐輒夜禱神請代卒不起鏐痛兄學成而未顯以歿遂不應科舉閉門絕客時人後生無識其面者通小學工八分有古文一卷自以才不及兄常晦匿之未嘗示人

林古度字茂之閩人與方文爾止杜濬于皇輩偕居金陵以文彩風義爲勝朝遺老年八十餘貧甚又失明冬夜擁敗絮旅寓蕭然及卒周侍郎亮工葬之鍾山茂之

詩清新婉縟有六朝初唐之風當康熙時新城王士禎
貽上主海內文宗諸老先輩咸折節與之交茂之嘗出
其萬歷甲辰以後六十年之作屬士禎論定士禎爲披
揀得百六十篇施愚山閨章讀之驚嘆以士禎爲真茂
之知己也

余懷字澹心閩人居金陵工詩最爲王士禎所稱重所
著板橋雜記備載明季金陵風俗其子賓碩字鴻客作
金陵懷古六十咏每篇冠以游記始舊內終大本堂周
亮工陳維崧諸公序之其嗣式微貧而貿易不能世其
學矣

吳日景字函三桐城人兵部尙書用先之孫也崇正中
官中書舍人僑居江寧中西園世稱六朝松是也日景
工詩有世儀堂集

方文字爾止桐城人居江寧工詩交游盡一時名士著
有龠山集學者稱龠山先生其子孫仕宦顯達仍在桐
城也

何采字濮源一字蘆莊桐城人明大學士文端公如寵
孫也采占籍江寧城順治己丑進士官至左春坊工詩
尤善書得歐褚法爲時所重今其子孫在庠序者讀書
立行不墮其家聲云

周在浚字雪客大梁人侍郎亮工子也亮工官江安糧道在浚遂家金陵亦以詞翰知名有金陵百咏及竹枝流傳最盛

高辰字白雲四川金堂人博學知兵少年館於威信公岳大將軍家後以翰林改官華亭縣知縣次年因行取禮部主事攜家來金陵嘗冬夜過南城看月指列星告人曰金川仍有三年兵戎始克平定後果驗自言嘗於威信府請乩仙卜終身有少年事業蛟潛壑老去功名鳳峙岡之句乙未改官鳳陽府同知卒其子扶柩返停儀鳳門外十餘載始歸蜀

黃文煥字坤五福清人由山陽令入爲翰林寓居金陵
著有杜詩掣碧史記莊子注

王宏祚字玉銘雲南人官兵部尙書致仕過金陵愛棲
霞天闕之盛遂家焉卒葬茅山

沈用濟字方舟錢塘人游歷閩粵燕齊卒歸江寧歿後
柩寄城南安隱寺朱卉有詩弔之

韓錦字玉溪北直宦家子僑居江寧性傲不能隨時俯
仰耽吟咏放情山水以文史自娛有故交適來官江寧
聲豔一時人或勸之謁見錦變色不答貧甚冬月著葛
衣嘗有移居詩云三秋霜老猶栽菊十月天寒未授衣

其風義可想見也

蕭雲從字尺木太平人性高曠工畫法大癡山人於采石太白樓壁作五嶽圖雄奇變幻觀者覺烟雲起於堂上至今人猶寶護之後避亂居高淳以女字邢氏其畫之畱於高淳者甚多子一暘別有傳

王澤宏字涓來黃岡人順治乙未進士入翰林官至禮部尙書致仕後僑居江寧

徐文治字壽人一字青山直隸大興人幼隨父宦江寧父擢建寧守卒於任文治庶出適兄不能容獨扶柩歸京師令文治居江寧徐公之官江寧也有邸舍一區在

秦淮因脩

南巡臨覽名御河房其後燬於火及文治來居止矮廊數楹構
畦圃藝瓜瓠其中暇日輒與同社攜酒脯分題角咏文
治爲人甘貧樂志直諒多聞壯時游歷浙閩齊晉楚豫
咸秦出塞外俱無所遇年五十歸使爲詩多可傳之句
然自是杜門不出矣

朱卉字草衣初名灝字凌江蕪湖人生四歲而孤母貧
不能自存改適舊縣古姓欲攜之往卉不肖依舅氏居
未幾舅死乃依吉祥寺僧旣長爲童子師教授自給原
聘妻家促之婚卉自度貧無以爲家親書文約退之性

喜吟咏游他郡訪諸名宿與之講切遂工今體所歷半
天下中歲僑居上元始婚卒無子晚依一女以終自營
生壙清涼山下病革作辭世詩肩輿徧詣親舊決別袁
太史枚題其墓曰清詩人朱草衣之墓卉自號織屨山
人嘗作謁孝陵詩有秋草人鋤荒苑地夕陽僧打破樓
鐘之句人亦稱朱破樓云

袁枚字子才號簡齋錢塘人少穎敏爲學自成年二十
一省叔父於廣西巡撫金鉷一見異之試銅鼓賦立就
辭甚瑰麗舉博學宏詞報罷成乾隆己未科進士改庶
吉士散館改發江寧爲知縣時尹文端公繼善爲總督

最知枚才枚亦遇事盡其能嘗朝治事夜召士飲酒賦詩市人或以所判事歌曲傳之既而去職家居再起發陝西遭父喪歸終居江寧作園於城西曰隨園世稱隨園先生四方士至江寧必造隨園投詩文無虛日故隨園詩文集上自公卿哲士下至市井負販皆知貴重之海外琉球至有采其書者仕雖不顯而世謂百餘年來極山林之樂獲名譽之隆未有能及者也卒年八十二蕭一暘字孟旭一字巨坡蕪湖人鍾山老人尺木之子也畫有父風尤工大癡筆法然數奇落拓往來江寧主其姪志平家有友江寧陳某亦奇士也別多年訪之不

獲月夜過城北開園中簫聲識之曰此陳君簫也因扣
門相見甚歡繼以歌泣一暘性倜儻好奇知風角精韜
略懷才不遇論者惜之

新修江寧府志卷之四十三

人物十 技藝

漢李南字孝山句容人少篤學明於風角永元中太守馬稜坐盜賊事被徵當詣廷尉南特通謁賀稜意恨之謂曰太守不德今當卽罪而君反相賀邪南曰旦有善風明日中時應有吉問故來稱慶耳旦日稜延望景晏以爲妄至晡乃有驛使齎詔原停稜事南問遲留狀使者曰向度宛陵浦里旒馬踠足是以不得速稜乃服焉後漢書有傳

沈建丹楊人世爲長吏建獨好道學導引服氣之術又

能治病輕重應手而愈嘗遠行寄僕婢並牧羊於人各與藥一丸皆不復食建還更與藥乃食如故

按舊府志錄吳之趙達晉之陳訓戴洋郭璞俱非江寧人景純博學高才忠節垂聲尤不應列諸方技又載六朝徐文伯嗣伯且云丹陽人考南史乃東海人與江寧無涉南史不過因張融與之善牽連著之耳茲概不錄

晉扈謙精易卦嘗在建康筮一卦百錢日限錢五百以三百供母二百飲酒并施貧乏五百足一卦千錢不爲也桓溫妾產桓元時至艱謙筮曰公第六閒馬埒壞竟

便產當是男兒聲氣雄烈震動四海溫贈錢三十萬夫
人亦贈三十萬謙辭無容錢處溫不聽後仍筮卦養母
錢日以醉客不問識與不識一日母亡謙辭酒家許氏
云因緣盡矣安葬而去不知所之數日許氏家人於落
星路邊見謙卧地始謂其醉捉手引牽惟空衣無尸云
謙居金陵攝山寺碑云北望荒邨扈謙卜筮之宅是也
隋耿詢字敦信丹楊人也滑稽辯給伎巧絕人見其故
人高智寶以元象直太史詢從受天文算術遂創意造
渾天儀不假人力以水轉之旋于閭室中外候天時合
如符契又作馬上刻漏世傳其妙煬帝卽位進欹枕授

右尚方署監事著鳥情占一卷隋書有傳

南唐吳廷紹爲太醫令烈祖食飴喉中噎國醫莫能治
廷紹以楮實湯進而愈焉延已苦腦中痛廷紹密詰廚
人知平日嗜山雞鷓鴣投以甘豆湯亦愈羣醫叩之曰
噎因甘起故以楮實湯治之山鷄鷓鴣皆食鳥頭半夏
故以甘豆湯解其毒耳見南唐書

周文矩句容人以繪事爲後主翰林待詔工道釋鬼神
車服樓觀尤精士女而彩色纖麗後主常令文矩畫南
莊圖覽之嘆其精備閱寶中進其圖於宋文矩有游春
搗衣熨帛繡女等圖傳於世見南唐書

顧德謙江寧人善繪人物風神清飭舉無與比後主愛重之常謂曰古有愷之今有德謙二顧相望繼爲畫絕矣見南唐書

董源善畫後主時爲後苑副使畫多作山水龍鰲出洞升降自如又工人物一日後主坐碧落宮召馮延巳論事至宮門逡巡不敢進後主使趣之延巳云有宮娥著青紅錦袍當門而立未敢竟進使隨共諦視之乃八尺琉璃屏畫夷光於上蓋源筆也見十國春秋

徐熙江寧人世爲江南仕族識度閒放以高雅自任善畫花木禽魚蟬蜨蔬果後主最愛重其蹟熙常於雙縑

幅素上畫叢豔疊石傍出藥苗雜以禽鳥蜂蟬之妙乃
供後主宮中挂設之具謂之舖殿花次日裝堂花見十
國春秋

艾宣金陵人工畫花竹翎毛孤標雅致別是風規阪草
荒榛猶長野趣昇州厲昭慶工佛像句容郝澄以丹青
自樂沙門巨然畫烟嵐晚景當時稱絕竹夢松工畫人
物宮殿巧絕冠代解處中畫竹盡嫵媚之態應用以書
法名江南善寫細字常于一錢上寫心經又于粒麻上
寫國泰民安四字見十國春秋

宋朱杰生而異相有隱德治人目如神鍼甫下而醫旋

徹達明嘉靖中其裔孫名鼎者亦工眼科召用有劾錫
賚甚優

王生金陵人瞽而善聽聲丁晉公守金陵王生潛聽其
馬蹄聲曰參政月中必召拜相果如其言後眞宗晏駕
謂充山陵使王生來京師俾聽馬蹄聲曰有西行之兆
諸子責曰爾知相公充山陵使有是說耳生出語人曰
蹄西去而無回聲恐有他命後果罷相分司西京繼貶
崖州

劉虛白金陵人善相陳執中爲撫州通判使者將劾之
虛白曰無患公當作宰相使者果被召半道而去王益

知韶州日幾大拜還金陵名虛白問狀虛白日當得一
都官止耳益大不懌以他事訟繫之已而益果終都官
郎中

李士雲善山水尤工於寫照王介甫鎮金陵雲爲傳神
介甫贈以詩曰衰容一見便疑真李氏揮毫妙入神欲
去鍾山終不忍謝渠分我死前身

元蔡槐德興人僑居建康工相術莫知所師受與人言
率肆意指陳無所諱避人信而畏之至元閒世祖問朕
壽幾何對曰壽及八旬時春宮未建嘗召見便殿俾定
儲君於諸皇孫中對曰某位他日必爲太平天子卽成

宗也授集賢學士辭不拜隱居鍾山

陳梅湖善皇極數受知於元世祖凡遇推卜多以易數
諷諫朝臣咸敬之官至江西宣慰副使或問何不爲諸
子計曰吾數非其所當傳且命貧賤令其粗知農事足
矣

明嚴景字克企本蘇州人祖道通以醫徙金陵景幼通
易理尤精家學永樂中詔選名醫子弟讀書備用景在
選中益探聞輿名噪京師求療者戶爲之滿其行誼志
節尤爲賢公卿欽仰云

貝絃字宗器南京人幼習儒精天官學被薦入欽天監

正統景泰間從征占候有功成化戊子因災異條陳弭變圖治六事言多可采

陳遠字中復應天人永樂初翰林待詔繪事精雅

周文銓字汝衡江寧人取內經本艸難經等書務窮精奧診病立方多與衆殊嘗語顧璘曰醫非盛德莫能操其慮非明哲莫能通其說知物者巧知證者工知生者聖知化者神其持論精微如此

鄭之彥字蘭巖江寧人父道光精六書善琴并畫梅之彥少爲諸生屢試不售輒棄去好神仙吐納之術遇異人授以刀圭更精於醫有名僧古曇者設壇普德之彥

偶游其地診視之語其徒曰爾師六脉沉弱殆不起明日共傳古曇坐化其神驗如此長子笏有文名少子簠亦以醫名工篆隸

孟繼孔字春沂洪武初隸太醫院幼習舉業游焦澹園之門後習醫生平存活嬰稚未可數計所著有幼幼集子景沂亦以醫著

蔣武字用文世居冶城之麓永樂初官太醫院判上嘗問卿於醫効率緩何也對曰善治者必固其本急則傷矣是以聖人戒欲速也仁宗謂其言足以裨益治道卒謚恭靖子主善繼其業

姜濬字子澄江寧人善書工小楷仁宗在潛邸命寫泥金經喜之卽位授中書舍人

司馬隆字季平江寧人精於醫內經丹垣諸書靡不研究遇有危疾端居靜繹或通夕不寐必得其病之源治之法而後已有貧士遇疫親族畏避隆診視不輟嘗曰人皆有死豈獨疫疾能死人哉

謝儒江寧人郡廩生通醫每逢奇症他醫不能辨應手卽療文徵明爲文以贈孫世泰字約齋存心濟物洞精醫術世多稱之

李尚元字仰春江寧人以治傷寒名家每用藥言某時

當得睡某時當得下時刻皆應子言曾孫鍾懋時遇皆世其業有聲

王奇南京人通天文卜筮星數之學陳指揮妻死將歛其女遽病屬奇筮之曰女固亾恙母亦未死後當生二子卽欲歛其必越午午時妻復生後果生二子吏部欲黜二御史問其命奇曰命豈宜問哉公進退人材固有不命者不對而出

周相南京人厯官欽天監正洞曉歷算占候之術嘗言候占星宿不但知其分野度數其光色星星不同要須隔紙牕穿隙觀之一見其光便知爲某星百不失一方

東坡先生集卷之三
可言占候耳與武進唐順之反復辯難其所著厯法皆得精髓

李槐善風鑑居金陵朱之蕃爲諸生時槐決其必售及試禮部復遇槐曰精采殊常鼻端已正奪魁無疑腳指甲如有楞功名有萬里之行榜發果驗後奉旨冊封高麗如其言

吉兆來字逢生江寧人瘍醫誠朴無僞治疾有神效尤善用針其孫名人傑者得補唇異方七日補其缺平復無痕擅技五十餘年

金璫字元善江寧人精于醫不屑屑計利而好責人禮

貌某尚書寫數百言敘病源索方因信筆圈點以與之
璿援筆作答亦醫其句讀尚書見之愧悔謝過每對人
曰南京醫中有人

易光明南京人精於製方隸太醫院籍

楊守吉南京人善醫尤辨傷寒諸症有謝五老者夫婦
病感冒月餘矣飲食屬口輒嘔噦羣醫以死法棄去守
吉診之曰病久已去但小進食虵蟲爭上嗽胃次攪繞
作惡耳試頓食之當勿藥而愈遂以冷茶投粥頓與人
二大盃初尚作嘔旣而喜食如平時其他應驗多類此
與守吉同時各顯一門者如產醫李氏姚氏婦人醫周

氏雜症醫會氏瘍醫白騾李氏刁氏范氏小兒醫孟氏
接骨醫樊氏口齒醫鍾氏眼醫袁氏皆擅名正嘉閒
王元標字赤霞上元人少業儒兼精素難諸書崇禎己
卯大疫攜藥囊過貧乏家診視周給全活多人甲申之
季當事荐太醫丞不應逃於赤山尋葛稚川舊居卜築
焉著紫虛脉訣啓微又著醫學正言未就而卒子格程
其續成之

史癡名忠南京人善畫山水人物嘗往吳門訪沈石田
登堂不值見有素絹潑墨成山水巨幅而出石田歸見
畫曰吳中無此人必金陵史癡也

陳子野南京人書法鍾王俊逸可愛尤精繪事文徵仲稱之戒門下士到南京不可畫竹彼有人焉蓋指子野云

邢有都上元人好讀奇書尤喜星厯算數不由師傳獨契其解治漆毬爲渾天儀毫髮無差偶登友人樓望長干浮圖曰此影可射而入也遂閉牕戶塗塞諸竅止畱一隙斜對日光塔影果穿牕而入玲瓏宛具

陳景魁字叔旦句容人幼聰慧因父病疫罔效精誠禱天一夕夢老叟書授蚺蟪水可愈旣覺不辨爲何物博訪之始知爲蚯蚓搗水飲父疾立愈遂精心醫學治疾

皆驗著有醫案皆奇疾奇方也

馮鶴鹿句容人早歲不識字壯遇異人遂精相術且通義理有陳某問相判曰宴罷瓊林志氣豪洛陽新柳映宮袍文章事業俱堪羨不使霜飛上鬢毛其人竟發而不壽又相興化某判曰拜節莫拜初四五出門撞見花面虎千人百人相聚舞君莫舞君莫舞舞者舞苦者苦是人於元正五日出拜婦翁節行至橋上值有弄獅戲者爲觀者擠殞橋下死

朱良知字繩溪溧水人喜讀異書尤精地理著有堪輿掌鏡十二卷

丁毅字德剛江浦人神於醫路逢殯者棺下流血毅熟視之曰此生人血也止昇者欲啟之不可隨至墓所強使啟棺乃孕婦也診之以鍼刺其胸俄產一兒婦亦旋甦蓋兒手執母心氣踣而身僵耳鍼貫兒掌兒驚痛開拳始婉通邑稱神著有醫方集宜玉函集蘭閣秘方崇祀鄉賢

吳鑒江浦人精於醫凡沈痾怪症不可方物者診視卽洞其原藥劑配合不拘常格所著醫書博采極精識者稱其醫入神品

何正位字德謙六合人工畫臨摹前輩莫辨甲乙設色

清靈人物山水多仿李公麟戴文進

劉琮應六合人侍憲宗疾并療鄭世子授太醫院御醫
謝金六合人通方書著有傷寒論

黃懷英六合人八歲能琴通曉占術業醫藥不執方善
於切脉

張鸞范二松並六合人精於外科手至輒効

倪讓高淳人精通醫理永樂元年授醫官

邢尚英高淳人善丹青落楮揮毫精神奕奕楊文聰稱
其山水有王摩詰筆意兩中副車以畫師終

李鼎環高淳人善治目疾應手取驗當時有還人日月

之譽

邢獻之高淳人喜讀書工雕鏤之技以小胡桃一枚刻十八羅漢凡屋宇松竹題咏一切器具無所不備

國朝胡正言字曰從家居金陵精研六書著有印藪篆艸諸書所居名十竹齋

顧惺字又新上元人工書畫入古一堂與積書數千卷晚號種紙

田林字志山上元人美須髯自號髯農工篆籀

吳官心名九思以字行上元人善彈琴游公卿間語不合卽拂袖去之結廬清涼山下四壁蕭然古琴一張而

已

黃日炳上元人子德基並善花卉筆法靈動如生人爭購之父子晚年俱以詩酒自娛不屑干謁咸推重焉

龔賢字半千常熟人僑居江寧有隱操能詩章尤工畫僧大振劉琳俱上元人工畫

談志學字習公江寧人工醫術尤精幼科全活嬰兒甚衆貧者不取值人皆德之

尹懷聖字安臣上元人有僧仲理菴者受學於異人凡分劑不膠古法懷聖從之游得其秘要療治多奇驗貧者子藥餌不責報云

微挾奧遂以醫名延者奉之如神每相爭於路焉

談志鳳楊峻皆精幼科存活嬰兒無算一時名公卿咸相推重並江寧人

秦蓮字文水江寧人善畫山水品格高邁有元人風度周鐸字覺師江寧人讀書解大義性耽圖畫洞明六法筆耕養父終身不勸父沒寫照懸之中堂晨昏侍奉如生

周璿字崑來原籍河南居金陵工畫山水人物尤善龍馬每晨起畫龍呵氣研池和墨寫數筆而月而就畫馬亦然性倨傲高自位置求之不專雖達官貴人酬贈百

金不易也詩亦清占鎗法尤擅名

曹鈞臣句容人以彈名海內百發百中號爲曹鐵彈

尙承模號曰賓臣句容人得鍼灸法晚歲技益神有趙氏女患癩謀於承模曰是可鍼也齋三日往未至門女忽作聲呼曰攻我者至矣奈何承模至鍼人中穴者三疾若失

葉文機溧水人精心醫術有神醫之稱

武弁字功伯溧水人工墨畫尤善堪輿時爲天下堪輿第二云

章星文字人龍溧水人通星緯奇門之術每試輒中能

知未來事富膂力年七十八別親友曰某日吾逝矣果如期卒

武雲溧水人號石湖漁叟善鼓琴尤精鐫刻凡諸家法帖鐫石無不神肖縣署有二小碑皆雲集右軍字也武玉溧水人善畫每畫醉仙圖遠望似石卽之則仙或卧或坐或立參差變化閒俱能別開生面

薛方江浦人工醫術能變通古方以起沉綿奇險諸症趙之琪江浦人世醫嘗有全家食牛肉垂斃者急詢牛所病以醫牛法治之俱得甦

汪國涓六合人工畫花木風格高舉尤以松擅名

袁綬字紫若六合人業醫工畫其花卉得徐青簾筆意
謝恒字學久六合人工篆石乾隆辛未年鐫進陰陽文
圖章百枚

賜有貂緞荷包等物

董勛六合人世醫著有痘證邇源

顧天寵六合人業醫治傷寒如神辨死生於指下百不
爽一

倪守泰高淳人世業醫至守泰尤精嘗曰爲良相易爲
良醫難每遇災疫擔囊攜藥到處給診風雨罔懈

金雲翔吳汝靜皆高淳人精於眼科能以金鍼撥轉瞳

人

孫浪字白閒高淳人善畫得雲林大癡之神購者不冒漫應

黃孫藻善大方脈許元禮精兒科能辨痘症吉凶王之信精外科凡奇病無不立効皆高淳人

徐元房高淳人工畫艸蟲毫末畢肖極跳伏之趣子方煥亦工草蟲而人物更爲絕勝

曹璜字相侯高淳人諸生作書奇肆可喜有白毫山人筆意

許允中字公立高淳人長於丹青工翎毛尤善鬪雞

史爾佐工書法與吳季舒齊名而邁勁險峭過之周壽璉亦工書絕似王獻之筆法皆高淳人

邢原邠字度波高淳人工指頭畫京師貴人多有購之者

汪然字成齋江寧人精岐黃之術凡延診必先至貧寒家揣無資餌藥者則解囊給贈里黨咸頌述焉

張昌祚字世臣上元人少孤母命習醫繼父志親爲指講遂通其術乾隆乙酉己丑民間染疫昌祚診病給藥殆無虛日囊裏一空全活甚衆生平力行善事年登大耋子岳以儒醫世其家

陳其璣字玉衡江寧人習醫兼通內外科臨症多兢慎遵古方而運以心裁時奏奇効將卒召子榮命之曰醫以活人非求利也願爾習業濟人成吾未竟之志

汪炳文字醒菴江寧人工繪事游京師爲諸名公所賞嘆雖片紙尺幅人爭藏之嘗爲人畫屏風十二幅其子嘉捷用白金三百購回以爲家珍云炳文乾隆丙午舉人桃源教諭

崔瑤字筠谷江寧人幼穎悟性耽書史兼精繪事喜佳山水游屐所至幽尋不勸輿到縱筆作尋丈大幅浩氣奔赴令人生林壑閒想常云不得山川真境不可浪使

筆墨頗自珍惜雖豪貴不能屈晚號華林外史嘉慶辛未年九十七無疾卒

程家珏字揆百江寧人精于醫著有醫林適用一書

王度字式昭上元人工醫其門如市嘗出酬金與同里好善之士脩治橋巷費千金不惜尤人所難

常敬五江寧人工幼科頗有神效齋中雜蒔花藥常手自培灌欲令生機暢達云壽八十七

張復純江寧人善醫術工書法尤精篆刻鑄有詩品及七十二候圖章行世

高倫字敦五上元人工醫視病以切脈爲主體認入微

活人無算常與王度等捐貲力行善舉鄉黨稱之

曹賢字五遇江寧人康熙丙戌科武進士工書善畫尤精六壬數學事多前知

隨霖字萬寧上元人世醫乾隆癸丑邑患羊毛瘟症羣醫不能治霖與南城周魁主治略同一時有南周北隨之譽著有瘟症羊毛論行世生平樂善好施邑中彌相推重

陳凱字肅樂又字青谿江寧人精繪事人物山水樓觀宮闕工細不差累忝織造曹寅囑畫水陸變相十八幅施古林菴供佛僧人七月中每設瑜伽薦度法卽縣之

殿壁以示大衆焉觀者歎絕

况烈文字芝亭上元人工醫乾隆乙巳大疫烈文攜囊周視諸貧乏家全活頗多一婦人經阻腹漸彭亨其夫遠客甫回疑之婦不能白戚鄰以婦素行端潔共相驚詫薦烈文診之烈文曰非孕也寒氣客胞門使經血凝聚所致用溫經湯治之洩兩時許腹脹頓消其精審如此

徐岫字觀北江寧人世以醫著岫尤精其術一婦年三十許頻患少腹痛幾死岫令以東引桑根煎湯服烏梅丸下一物如鼈形其痛遂止邑中共神之

胡沅江寧人精痘科遇貧者不受酬謝尤必窮思藥料之賤者以代貴品郡人咸重其素行焉
伍宏杰字志三江寧人幼習醫學乾隆時充醫書館纂修議叙一等

賜醫宗金鑑全部

吳思忠字孝侯江寧人工書善畫尤喜畫猿錢塘袁枚稱其頗得易元吉家法構青谿艸堂于東園歌嘯其中陳毅贈詩有對字望衡皆畫裏畫中來訪畫中還之句實錄也

周魁字芍園江寧人工幼科凡痘症未發之前輕重死

生能預決之百不爽一治瘟症尤能審氣候辨虛實活人甚衆人以周小仙呼之著有溫症指書四卷

章廷芳字右綸上元人痘醫著有治痘秘要若干卷

譔永恕字尊五江寧人精嬰兒醫獨冠一時著有幼幼心法粹纂若干卷其子邑庠生昌會宏德俱以醫馳名乾隆壬寅春昌會被

名診 公主應手愈

賜大緞二端宏德子配道嘉慶戊午科舉人舉孝廉方正

蔡詒字雪川江寧人工畫善摹猿狙之狀攀蘿穿樹越溪踰洞能窮其情態求者踵至

南巡盛典所繪名勝各圖皆詰鑒定

俞天池句容人工醫著有痘科集解若干卷

汪榮字欣木六合縣增生工畫煙雲變幻頗得二米之法曹秀先督學江蘇以深山藏古寺題試諸生之善畫者以榮爲冠兼工寫生